

四庫全書

集部

欽定四庫全書

懷星堂集卷三

明 祝允明 撰

樂府

從軍行

腰刀把首報君恩
初事將軍出雁門
回首家鄉無限意
秋風吹上五陵原

前緩聲歌

瑤川遵穆晏汾水
從軒游立王啓靈
會道官亦交酬蒼

禽唳金支瓊鸞翫絳情靈賓受韻石子登引空謳聖日
麗萬舞祥吹振清球川后迎皓蜺波臣趨翠虬湘姬偶
瑤席巫女行玉羞天老獻秘文聖年無時秋

董嬌嬈

京洛何迢迢紫衢通麗譙采桑誰氏子不解意飄搖強
腕折高枝卑指攬柔條詎知枯殘日不愛彼穠朝何當
華堂上麗瑟歌此謠此謠固君情不移芳與彫吾將持
贈子聞是董嬌嬈

盧姬曲

盧姬貌似月復有伎如雲青絲覆鬢額歌舞漢宮春
參差銅臺上宛轉受恩頻君不見太祖會殺聲清人復留
妙妓西陵裏盧姬幸不為冤鬼為名嫁人花老矣人生
行迹自有時莫以遲速歎盧姬

邯鄲才人嫁為廝養卒婦

高下理有定金房須玉骨不解理有異三五月圓缺昔
為錦綺叢今為蕉萃窟嬌卧鄰皂芻夜半聞馬齧遥夢

趙王宮盈盈望秋月

隴頭樹

隴頭多嘉樹君持作梁柱
清晨覆賓相白日抱歌舞
哀哉北邙麓日日聽人哭

驄馬驅

驄馬紫游韁光輝照洛陽
朝辭上林苑晚入關鷄坊
無因道千里城邑少豺狼

關山月

明月度關山中天照蕃漢十萬良家子嫖姚甲待旦健
兒秋牧馬天子曉射雁亦有王明君獨抱穹廬歎

雉子班

雉子班何牡不顧女來語啄班班吾不如絞頸谷中班
班何班班何

天馬來

天馬萬里來天閑缺一字開天馬入群馬辟立視天馬長

安亦有首蒼食飽天子德天馬天馬在宛野

隴頭水

流水出隴頭白石亂高樹四海遠深淵原泉日夜注不
見人物景獨向東流去

吳趨

閭闔紅樓起皋橋淶水迴綺羅搖日麗車馬逐雲來施
日非吳艷機雲是晉才欲歌遺古調風俗轉堪哀

柳枝 六首

夾汴春來千萬枝綠陰隨處縛金羈殷勤休負東風意

曾把青芽細細吹

紫泉宮外曉煙和萬綠條含太液波只有帝家春色好
爭禁人世別離多

樹猶如此我何堪長笑殷郎氣不男若見女兒腰十五
一生蹤跡只江潭

隋家蕭后解傷春內苑親栽幾樹新出塞歸唐春漸老
美人思樹樹思人

白家只說舞腰肢不把紅妝鬪翠眉贏得美人憐又妬

一時都不愛花枝

營門只阻羽葆幢爭似連雲漕艘護國清風四十里
百年人說老平江

林鳥 二首

無奈恩情密臨別自依依思君如林鳥同宿不同飛
與君如林鳥暫聚還長離得夜乃共宿入明不同飛

古調

秦風

泰風傲時也歲律默遷夕飈傲物起坐多念歌以永言
灑商回秋泰風薄宵衝堂襲惟其音蕭蕭蛸咽烏棲蟋
蟀試吟豈無憂欣以耿遐襟肖形聲氣亦有裳衣無作
我羞朝日將暉昔之撫景鮮驩薄游今之撫辰力弗及
脩五十無聞先師無畏無曰其遲其日如駛皇序遞代
漫漫百年天之將旦無然爰爰

詩五首

巍巍大山高瀾瀾長河流人生百歲間有樂亦有憂

葱陵上槿朝華夕已休
傲載向南畝歲乃亦有秋
少壯在努力老大且偃息
偃息安此生此生須有成
努力不在少老死終無名

滔滔川上水
冪冪隄邊草
行行遠方客
厯厯山下道
道遠行易疲
白日坐已馳
無憂白日暮
祗恐嚴霜垂
日暮行復朝
嚴霜草以彫

中谷有道士
顏色常鮮好
被以松栢葉
啖以靈藥草
守氣存谷神
後天可難老
授我鴻素書
相期青雲表
衆人

不盡聞安能不枯槁神農遺世經穀食烝民寶物生天
地中萬形同一鈞小大各自齊聚散常相因高岸忽為
谷滄海亦飛塵弱質非金石誰能獨久存生世六七十
永者僅百年相去幾何許等死馬足論仙人莊子休為
君頗開陳

天天南國子聲伎妙入神審音類子野歌舞傾都闈城
邑不足留引領奉韶鈞浮雲翳廣路且與閭里親倡家
日還往哇淫累其真簡兮前上處謂言不足珍樂府久

隔絕繁籍猶相因嘯詒且自樂亦以共嘉賓

雜詩

鳳凰執聖符有道乃來儀白鶴抱仙姿俗士每慕之棲
啄非梧竹腥穢苟羈縻鳶戾與鷹擊性在哺雛雌翩翩
遵渚雁噉噉鳴聲悲青冥一舉翼萬里乃通岐潔食荻
中粟渴飲清川湄孤翔無亂偶高風羞詭隨

述行言情詩

五十首

昔受皇靈命結此軒竒姿一從辭銅璞雅負遂參差英

光沒騰越皓素變為緇茲辰起遙想推鑿倘還施但恐
時日促璋琥竟無期乃知萬物貴治琢當及時

大鈞鼓群有黃祇効成物流形隨風氣結性亦殊律吾
生托燕冀抱稟愧沉鬱返茲寬柔方茹和克彊屈所耻
非平康徒勝此迴屈

結髮屬偶句舞勺肆篇章前徵膂羊叔髦譽追滕王明
明內外祖公望張辟疆提劍多教術童弱企高翔安知
三紀後栖栖守榆枋

蒼姬建鴻歷祝丘肇遙封豐稊託后穰疏條凶周通九
江樹宗議司徒奮皇庸信枯爛材器闔建扇遐風淵淵
都漕君起官來南江雄畧絕類群宏圖奠茲邦五子繁
馬竇載以闢吾宗

曾祖抱至德天倪以和神善閉本無捷泯燿沒見聞辟
時道朱鬢傾否逢皇運微情委塞聰遵養晦衡門洪源
浚且瀦大川乃雄犇

赫赫惟王父自天擁英休完德奠瑚璉大積苞墳丘敷

言對清問獻納襄王猷宅憂秉大防

景泰初公居憂詔
奪情起任戍務公

執禮典
不應

旬宣向閩州冀方猶虞岳懋綽騰諸侯懸車耳

順歲高烈方弼彪

公有高明居安老亦畜小時從息經笥偃仰思至道繁
英藹修榮高簡稅不藻周羅千載語竹素光燿燿憶跪
聽公詔拜此濟生寶縣非躡短階昏旦恣尋討

先人備百行為仁乃其基至誠動萬物大孝數弘規慈
愛無等倫日月洞肝脾豈惟天止性在三道兼師母氏

既聖善孝敬極壺彝坤儀絕振古直當任姒期煦乳博
載間春秋望翔馳

七世美仁里八葉通德門五教植本始百行郁華文仁
義日可見金玉作庸言鷄鳴繩準出舉足宮徵存厚趾
靡顛丘長津從列原何為未受者卑垢辱華先

高闕衆祥集泰日百美具豐屋陵飛霄崇樓臨大路高
齋啟華器芳皋羅嘉樹良疇經適郭麗舫汎妍淑紳杖
旦日臨星曜時夕聚群公營威儀百彥盡能賦圖書恣

離核琴瑟鏗在御崇議每徵今幽求競稽古卮言藹蘭
馥雄辯激水怒觴詠富章什絃吹暢情素西園繼清夜
何愁白日暮

泰否冥幹運大小互來往童齡何讐戾忽使墮毒枉焉
知循陔慶遙成陟屺望萬生皆有終逆質胡不喪
大憂纏弱衷意氣盡荒漠向未遯長衢中路履綦錯零
霰殺翹榮朱光就淒薄辰邁萃華滋運消易零落

人理有太合太合及茲辰東楚當星戶

建辰之月

虹梁就鳥

津彼其行結悅予亦御周輪從雲來聚者盃醴合良人
永始承遙緒昌圖啓後珍嘽嘒山河誓與子並千春

執業稟公訓士節謹干祿力修貴潛蘊進達戒征逐踰
冠聞有司察業就甄錄校考既充賦膠序且餼育

人生有窮慄大化當極否偏感適三月凶割降重累鉅
痛深故創沈寃等墮海人生覆無天云胡不邁死

六極兼弱貧百惟萃凶孤素薄絲物懷坐為鄙人圖倉
箱既涼匱米鹽務錙銖自持倚桐安埋沈向泥塗

讀禮訖祥禫試琴成笙歌丘墳肆畋狩志行窮琢磨天
人貫麤微昔今紛網羅大道彌宇宙眇薄將如何

先人有高棲遺我端居室幸無喪志物塞楹簡編集皇
王植丕訓子氏張萬術閉闕斷來鞅庶以究昕夕

學聚勤殖藏息游解紆結寬原或流衍激泉共甘冽攀
條采碩果循畦屏衰葉幽禽答遐韻候蟲依氣節芳霽
蒙晨榮明輝揚夕月拔時附絕駕塞允謝塵鞅

服膺從聖軌厲志尊前聞敦厚覓砥道高明抗浮雲玄

元極三古疏通窮八垠焉能為栖栖揜抑斥鷃群

老聃貴知希莊周識齊物山淵故應平精象藏恍惚因
知在矢溺居然返冥極安知臨牢豕終為祝宗繫

昔在杖膝下拊頂稱佳兒珠鳳已驗文棊虎亦彰竒所
企自有立名位豈足期自從勝簪弁顛躋逢百罹握志
壯室餘薦名僅鄉司逸足遠市肆永媿英賢規

浮名雖或就風尚乃彌堅漆雕有風期恒虞終邈然英
游並彙征予猶畏爭騫茲辰更不伸蚘蠖盤黃泉因知

隨時義聖謨固昭然

戔戔抱微稟自擬猶萍蓬企瞻先哲民終羞絕蘿松追
隨不越群胡足為不同何為蕩蕩世亦復此不容無悶
見君子先師嘗發矇平平王道間萬厲頻交攻苟無反
躬術何以禦諸兇皇仁卒全物莫高匪玄穹

斯人各有尚沉潛與高明伊予獨坦蕩未解懷戚營既
不畢狂狷安得遂中行所睹恒廓如萬有通一平泰萬
輜如毛矐矐已千齡不知要其終得喪將焉徵

同人貴郊野氣度本惡狹出入州閭間清濁且參夾無
衰桑梓敬幸共扮榆洽鳥獸不可群非人其誰狎

大儀靡停運百生豈淹息麗天星漢度附地蟲鳥疾把
策詣有司五往五見黜巖棲豈無尚塵託病多役錢刀
壞心氣霜露損毛質蕉萃勿復言流塵蒙白璧

陳根託九壤材樸各能蕃剥果存孤碩微稊僅不殘芘
芘萬植中吾獨妬其艱空務封沃勤柯條竟疏單

疏單勿復道幸抱此高襟妙鑑既弘照大車亦雄任如

何覆載洪行迹復淹沉孤征即長道纏綿荆莽侵馬能不跼踏日月坐以深

績勲惟在力獲應非緣劬每當紛紜間儵忽發靈虛皇樞一納牖神明隨固如其來眇亡歧須史充九區猶操獨繭綸一引盈車魚又若陟春囿萬榮一時敷研數皆可食百實皆甘腴由來自不識祇覺本所儲

歧路紛百慮三十尚擇術規空際無象踐迹室寸尺先師有遺槩四十迺不惑冰鑑端服膺物貌詎纖忒交衢

紛總總大路遵有一皇皇孔氏程聖愚乃同則

萬理盡東魯群空乃西來餘子騁千塗憧憧何取材學
聚蔽穹壤白紛無遺哀熱然對今古至樂不自裁

百代為宇宙升降成興衰興衰極變化忽已邁茲期方
策布群賢建躬各隨時森羅丙法戒所在吾有師

有師蒙獲富君子貴為己每求同若人力勇由知恥周
身飭百行建節廣綱紀任重扛九鼎致遠道千里細德
未足論大幹敢推靡丈夫生所期恒存在後死

明王方御寓世才乃微庸禮樂建皇極風猷歸大中亭
育茂登殖聲名粲光融卑高百有位道術何終窮

仲生能樂志夷吾性善養恣任總勿闕道林胡偃仰名
都富雄第山池半邑黨崇麗摩浮雲瓊筵日弘敞水陸
窮羅羞歌鍾沸繁響妙伎逾二肆游童列彌廣畢性聲
色中麟臺進功賞

素無經世懷學仕本先訓終然拙枘鑿株木斲久困渾
玄當有期或合阮君遊元龜幸垂兆長往乃無悶

卷三
築舍負崇巘高卑緣秀林翠嶺綺晨暉丹崖麗夕陰入
坐交飛英當窓語幽禽山人適云靚寫性將清琴郊居
賦既就白醪亦可斟循麓看時藝桑麻長方深未必談
名理歡暢已彌襟

歷榆樊石扉坳垣卑四周前楹舒廣場後宇環澄流微
淪帶山趾半覆花竹幽長夏且游浴高蔭終日休豈必
商丘開點爾聊同游

清晨風候淑引策出郊郭青黃交遠疇循澣桑沃若白

雲被華岑飛澗濯幽壑汎眺思累新冥會神逾廓命傳
賞已豪孤尋寂倍樂

雅尚窮闊覽邁蹤愧卑纏卧游空能賦道觀多歷年終
南華岳接峨眉太白連九疑元無地太行非有天岱宗
日華浴祝融星漢懸朝飧赤城霞夕拂匡廬煙洪河春
裂壤橫江秋勁弦因過洞庭水自擢瀟湘船東海本吾
宅太湖襟烏前龍宮多寶藥洞穴鎖禹編靈期似當值
旦暮相付傳

驅車出衡門薄游覽九州東征畧瀛海西陟升昆丘冠
巾岱華竦襟帶江河流驗蹟章亥趾裁貢禹王疇汎觀
山海圖遐尋府穴幽八維何所極撮土此可求

璇穹積重霄廻運迅不停曜靈爍神燭望舒循九行三
垣列君臣萬緯流物形河漢夜半轉四時各財成靈憲
炳乾文至精存吾徵

萬齡同一域千哲共此契遙邇幸相聞師友丈室內行
止每討論音辭時賡載單躬事百賢其益故宜大

遙賢故懷益密哲重應欽四海三數君垂眷後先深年
位非所限存沒或殊今淵淵玄酒味粲粲瑤華音懷哉
以拜嘉畢世銘卑襟

仲尼欲無言六籍終亦呈林蕪向春敷有喙隨風鳴齋
房坐清晏文言時有成左生潤瑚珮莊周厲風霆二漢
隆體骨六代繁丹青至哉統其全周後惟唐聲山鷄且
自愛蠅辯方營營

學優在用行時舍乃含章士業豈空言斯世存維綱脩

政用熙載樹禮為周防生養蕃卵胎芟夷謝蕭糝文思翊
無為樂聲薦登康本未有宏模千目森鋪張褐襟衷短
簡可布亦可藏

至道極心性域外有真覺曠生幸聞脩馨辯豈喧較萬
變終不繆吾自了滅樂

鳳鳥不世見四海以德稱虎豹伏深山雄鷲乃馳名日
月遍經天夕伏亦沈冥目趾待成功誰不仰其明所以
孔仲尼君子疾無聲嗟子蹇淹留閉戶乃浮名高卑共

彰徹近遠均一鳴惟憂邦必聞求之無其情

六籍統宇宙七緯鍵天人百子錯町吟萬家騰煙雲眇眇子日接泳洽如淵鱗冥蒙日思道繁發時摛文紛綸向一貫光彩摩三辰向來覺性言寂寞難重陳至樂終百年與爾同埃塵

金蘭操 二首

初趙魏公子昂與先總管友善游吳輒就館嘗為總管泥金寫蘭二本祭酒胡文穆公為先參政題二楚聲允明保之復綴二琴聲以語兒孫

金蘭之猗猗兮寫我心以貽兮聊與子同歸兮
兩公閑閑兮貽我金蘭兮金蘭也且閑閑也且

和陶淵明飲酒二十首

僕本拙訥繆干時名兩年之間三謁京國游趣既勸風
埃黥然舟中有二蘇和陶詩夜燈獨酌讀其飲酒二十
篇不勝悵慨聊復倚和

昔者病斯世庸人常擾之百物安大化甚似垂裳時袞
袞元化中吾生託於茲學道三十年今辰聊寡疑願言

戒迷塗靈臺亦有持

明時耻韞玉抱策下丘山所獻幾何許腐義數千言有
司繆甄錄一出踰十年身世無一補何物期自傳

士生三代後干名本其情所歎少可知科版獵空名二者齊
亡之何以為此生此生幸長存得失何復驚陶公但飲
酒千載名自成

大鯤本淵潛化形亦天飛截鶴續鳧脰二物均為悲日
月繞玄度萬象各有依天地會有終脩短同一歸吾生

向妍華何惜此日衰有酒不解飲而問彼從違

大道本一致無間寂與喧每有希夷時不見耳目偏逝水喜
東流浮雲忘故山美人隔秋風涉江耻空還旦莫或遇之

莊周有遺言

客來相話言言多非與是問我誰適從我不識譽毀幸
客來相過惟能默飲爾隨意翻瓦盆不解彈絲綺

秋霜瘁榮木春露華搗英逝者不能已愛憎誰為情吾生四
十年強半居欵傾不知誰為之孰為相號鳴局促百年

內安足稱達生

鳳鳥有五文不共羣禽姿言欲覽德輝來下梧桐枝文
采衆愛惜云是應世竒廷無簫韶儀好文空言為恐終
返天山逝難風塵羈

世事不可極遇酒意自開寬然處百年亦有幾好懷吾
駕無迴輓何適亦何乖夫子惟天行微生病栖孺子
濯以清屈公溷其泥幸此杯中物與我多合諧醉中態
多亂真抱自不迷皇唐事悠然古意暫可回

回首望鄉井甯在東南隅倦鳥不出林胡為涉川塗冬
半多北風疲馬不奈驅昔行氣長健茲來感有餘園田
苟可治豈不懷安居

長愧先師言憂貧不憂道勞辛救寒饑容體易枯老自
從強年來頗不患衰槁翁翁電影間英交亦何好澹然
無得喪恐有身外寶靈龜不朶頤乃活歲月表

吾足如轉蓮遇風無停時節候迭代序常與家室辭三
歲凡五出別離復在茲行止豈有津誰為我稽疑不若

巢中禽乃免霜霰欺天運實為爾通塞任所之

嘗喜陳圖南託世在夢境亦有阮步兵六旬且一醒神
解與辟世此意在各領汨汨糟醅間少復此冥穎哀哉
羊皮人方彼燿虎炳

四十不擬老老狀日已至飲量復減昔三飲已復醉詩
來亦信口甲乙懶排次遐覽天地間何物如我貴所恨
每自喪長失本然味

所乏百畝田亦須五畝宅居食少給躬何復世上跡一

身自賓主一日足抵百知我不暫舍舉眼天日白默然
便歸化亦復何足惜

安世至此日世紛亦已經莊周不畏煩為人校虧成五
岳屹常居四序乃遷更微子為之奴箕子出門庭誰能
外闔闢妄動樞機鳴密雲自西郊蕩蕩周文情

然燭能為月搖翼能為風手有造化能身在造化中順
時以道用天人乃相通如何負折鼎而欲求張弓

青天恒高高欲上不可得文成食馬肝漢武知復惑狂

念如推瀾滔天不容塞坐此弊其驅亦復幾喪國吾有
升天方難言姑緘默

卜商有遺言學而優則仕學既非為人仕復寧為己有
玉求賈沽無道穀亦耻仰瞻夔龍朝俯愧蓬蒿里駸駸
饒二毛行行入四紀馬逸駕可受風回楫須止爾無操
御中顛覆何所恃

二儀不翻覆萬生豈無真物情雖馮時中亦含元淳揚
子本清靜銜垢作美新賈生抗高志慷慨為過秦其君

或唐虞彷彿皋契塵誣已徇一時哀哉邁其勤因知紘
紘內心與身自親會須直躬行大道無迷津提壺掛舟
傍還戴漉酒巾何必訪巢許今古皆斯人

秋懷

時運無長榮清商多悲音悲音一何苦壯士有遠心蕭
蕭風篁亂琴瑟蚺蟻吟寄言眷萬古託之千霜林潯陽
有餘波涯岸倘能尋

己巳閏九月十三夜夢中為游山詩

春觀入西岫區名意自別松嵐結幽賞蟲鳥弄餘悅花
氣韻蒼沈樹膚落翠雪天行無塵染丘卧白雲潔心在
道不違未覺萬物裂三爵已餘酣清心寫泉月

春日醉卧戲效太白

春風入芳壺吹出椒蘭香累酌無勸酬頽然倚東牀仙
人滿瑤京處處相迎將携手觀大鴻高揖辭虞唐人生
若無夢終世無鴻荒

別唐寅

長河堅冰至北風吹衣涼戶庭不可出送子上河梁握
手三數語禮不及壺觴前轅有征夫同行意異鄉人生
豈有定日月亦代明毛裘忽中卷先風欲飛翔南北各
轉首登途勿徊徨

夢作月山獨步歌

不念白日塵宵賞有靈悅山蹊任襟入不必有昔轍石
淙長寫韻風林時落葉凍狄僵石霜躍鱗觸潭月山空
夜深靜魑鬼時出城自非返冥極誰能畏城闕

擬傷亂

楚氛望方惡魯戰謨未諧晉糴每多閉秦饑良可哀三
精塞稜霧暘雨更為災巴蜀風塵暝關河士馬來洪流
滅阡陌溝市盈饑骸豈無眠戈誓慷慨擊楫才夏屋既
漂搖郊壘多崩墮楨幹可相尋松栢亦已摧天王下制
詔仁聲九域開庶幾起剋客猶上黃金臺

代江南水災謠

天皇耄不事地后虐不仁盡卷天河水淋灌九州人九

州人食多在江南江南濯沒奈何堪之柰之何人死無
萬數薪絕竈冷無菜煮更那得菽與黍遽如許推龍虢
挽龍語汝不應吾吾請天公來解謫汝

九愍

九首

庚午暵吳越間民瘼作九愍

溪毛圃芽鮮芳殊吳儂恒食饒嘉蔬今年大饑百年無
百年無柰空腸齧野草同牛羊

大麥青青四尺長大水過頭一尺強安得不托與餒餓

無飯餽且自可秧不成苦殺我

四月涪水麥不秋五月插秧水不收良田萬頃盡洪流
盡洪流大無禾民皆死如國何

棟撓室摧墉善崩沈竈產盡不得烹康衢第席通流平
通流平慕鳴鴉望伯禹懷有巢

饑亡溺七十七五載降之疫亡亡數誰生厲階令帝怒
令帝怒半為鬼厲階人安富貴

有田莫買只賣屋况有筐箱與巾服妻子子乎牽出驚

牽出鬻汝不肯推溝瀆竟死等

舊乞無幾新乞多吾食不續欲分何汝不吾分越奪那
越奪那乞化偷孱則丐狠則樓

舊田不粒猶征逋新田為淵租未除農來為兵強執爰
強執爰絕錢鏹國無農其何國

官困曠空抽民米富人削瘠貧人死嗟嗟土牧亦勞只
亦勞只荒政難弔吾民嗟吾官

水詩

雨漫天兮天不得見水漫地兮地不得踐烝人不粒兮
桑田變神仙老死佛入滅伯禹乘龍仲尼乘筏出八極
兮睨洛滄而不即公無渡河兮公既沒婦逐狂夫與子
偕溺青山推鼇足斷蛟蛇騰拏萬物錯亂厥初天一分
生水其載與天地兮為終始

沈憤

燭龍奔天衢不照雲下人陽貨盜玉弓仲尼糧絕陳筆
絕春秋成乘桴汎洪淵莫食汨羅魚腸中有靈均青天

上無路黃泉下無門漫漫長夜中萬古齊一塵

知山堂雅集

小山不妨宦中隱從近闕無論車馬色幸共禽魚悅風
泉夕韻襲霜月冬氣潔醒醉齊一襟心賞方茲結

雪後揚禮部邀宴用謝宣城韻分得濁字


季冬雪始降佳氣通歲朔君子良燕會時哲總延擢揖
遜筮賓禮登奏幽嘉樂蘭薰互霑襲松顏齊卓犖遐覽
萬物昭無復見點濁微言共一契所寄在綿邈

召父歌送朱版曹升之守延平

西北有高山東南有大海生我延平民居中百千載遠
在天南頭去聖人萬里欲得無菑害祇賴賢守宰聖人
念遠人賜我慈父母輟其股肱佐來為赤子乳我望朱
夫子如望漢召父請為召父歌女知召父不召父善治
田從橫正疆畝始子我錢鏹以及奄銜艾耦耕并牛犁
杭稌諸種藝田功多方理要領在水利廣開溝門闕處
處廣灌溉均水作約束刻石防決汜劭農走阡陌止舍

即野次召父善教人頌訓從幼艾孝弟正家族勤謹不弛怠趨役赴公事和孫於社火有稟特秀異使結衿帶佩入學共絃誦學古壯而仕召父善阜財民產加豐大召父善聽訟無情不誹冢饑渴召父食寒裸召父被召父善使人隨時各分代召父善事神水旱不為厲人口歲增倍訟盜悉衰止召父去已久循良風聲在惟有朱夫子甚與召父似凡此召父善朱夫子盡備夫子來母遲百姓日候伺凡此召父事於今益有賴一一速施行

惠我起我憊上戴天子恩夫子還入拜願為公孤貴名
與名父配



懷星堂集卷三

欽定四庫全書

集部

懷星堂集卷五

四

詳校官監察御史_臣曹坦

中書_臣劉源溥覆勘

總校官庶吉士_臣何思鈞

校對官中書_臣葉蘭

謄錄舉人_臣張護

欽定四庫全書

懷星堂集卷四

明 祝允明 撰

古調

夙駕邁皇邑

夙駕邁皇邑送胡侯也侯宰吳而循將述職
朝於京師民願其陟明而懼其不來於是交
懷乃述是詩送之凡二篇

夙駕邁皇邑奏計天子闡命臣宰吳民民淳幸成治君

子閑禮教細人勤耘耔潢池徒涉境亦幸免顛隳歲月
可少假當轉瘠為肥臣政報不欺大君企鑒裁

夙駕邁皇邑公去我心悲京吳期月程父母何時歸所
慮大君留吾儕將疇依賢人在高位庶績用咸熙子產
往作相嗣之來者誰大君一內外留遺皆賢才

怨詩

繁霜隕衰秋萬物無一歡后稷苦望歲仲尼唱猗蘭東
海有慙龍西崖有鸞文王舊時孫極古無人彈

京館登樓眺遠

登樓睇遙際，邇值城東阿。都市無曠壤，萬室交鱗羅。花
鳥不見妍，鳴輪日衝過。衢喧萬方言，嘈雜絲吹和。贊皇
籌幸運，仲宣憂獨多。吳邦弗可見，不樂將如何。

舟行汶上薄暮看月作

璇蓋瑩空青，飛鑑泛華艷。川原邈夷曠，踈木媚寒澗。廣
路斷浮鞅，旅翫諧靖念。跡逝偕志行，萬里靡坊塹。苟無
忠惠持，誰能勞不厭。

自京師南赴嶺表仲冬在道中

秉策志渥丹牽絲及班艾拜寵北闕下寄命南嶠外霜
履將蹈冰虛舸循寒瀨越鄉慚古節垂堂慄先戒劉公

存社稷雅尚幸終會

余弱壯求仕夙願令長今幸
如志深與劉梁言志符合

一丘

沈結膺三歷擬投帶晚蔭答蒼靈赤鑑慎無昧

五十服官政效白公

五十服官政六十方熟仕七十乃致政古今固一致吾
年五十五始受一縣寄七里劇彈丸亦有社稷置夙懷

同劉君

後漢
劉梁

今此幸諧志所憂脚本短時彫虞易蹟祇

應盡素衷玄鑒不可悖一區石湖水漁舟早相伺

夢游二首

航葦緣曲谿峽深谿轉幽澁靚水氣甘葱蒼木蔭稠空
舫孤持檝愈入世彌邁步履窮豎亥祇此適余舟蟲鳥
元共性非契我何求

予行物已隔極境愈欲至獨有仙巢子被髮跪雲內栖
巖玩頽陽流谷響清喟須臾始云靚伺我九千歲海中

多真人徒美遐不值琅霄有颺輪中夜以為會

讀余侍御游泰山記詠其間二三處

明堂

於鑠姬后締茲合宮爰宅神明穆穆王風降及後王以
奉土木彼營於朝形侈實黷今我涖瞻猶拜文武念茲
草木且附聖土有赫我后三登五咸臣願師周唯后用
鑒

絕頂玉皇殿

乾居冠峻嶽承級通明宮星辰綴琨棟雲霧彌璇墉撮
齊入金門拜肅闕天容俯躬覽八表辨方識疆封西北
拱王室舟車方會同

日觀

我昔聞日觀想像當雄哉君今登日觀真從日邊來君
言日觀高踞山之東左有天門右有絕崖從中突起一
片石不知千丈萬丈上撥浮雲開扶携石傍東面坐但
見東方無際畔盡在莽蒼滄茫間上不辨穹霄下不分

人寰八極總一景馬知別華蠻勿心聞天鷄鳴一聲恍惚
紅光射破青冥端龍宮煨火齊琢為太陽丸海波瀲灩
玻璃翻搏桑脩脩掃三山衛霞從霧紛爛熳五彩錯亂
多朱殷龍車不須轂跋烏不須翰奮迅升天關游天衢
兮循天環開闢六合天尊地卑萬物出作咸乂安日觀
之日乃如此亘古不息正天紀蒼生仰照宣重光吾能
言之自此始

方烈婦詩

芙蓉託藕根藕折芙蓉萎雄劍出土中雌劍飛相隨
桐城有女姚嫁事方家郎貞心兩松栢信誓雙鴛鴦方郎
中路墮女姚治其喪明朝郎入土何事妾不亡妾有十
尺絲玉質奄從化一夜寒霰零蘭枯蕙亦謝煌煌雙白
璧合瘞南山岡宛宛兩柔萋為人挈三綱旌書下萬乘
烈聲騰九有九原多雜臣試問方家婦

龍川山中早行

磻磻左山影橫截右山腰辨色鳥護翔微光漾晴朝浮

雲若中斷蔚蔚方行遙

朝雲山腰生我在雲中行只恐雲載我飛上白玉京世
塵邈已隔天鷄猶未鳴須臾微風發東極金烏升

莆田鄭殿中綠野亭

吾聞烏山下千載君子宮云誰構此者柱下有遺風昔
與韓忠獻同升事仁宗抗節匡王度寒歲榮霜松翩然
返辟羅考槃亭此中孫子聯翼翔邦人亦欽崇出處鑒
茲宅眷言均帝衷

贈倫解元 三首

佳人出南國鬱鬱春松姿手有龍卷文忠信以自持茂
年秉高義淑姆群婦師君子聘好述任如共風期關關
雎鳩化四海為雍熙

珠玉一出世見者愛輝光雲漢倬昭回衆夫仰文章煌
煌錦繡段願為衣與裳醴泉消渴心嘉禾望充腸亭亭
梧桐樹可以棲鳳凰

明王攬大字百福日富來車書上皇邑八表無遲回與

子遇原野攜手乃徘徊君行遵大路日以寫予懷

贈王翰林

思

先公昔登庸寔出元禮門雄篇累賁遺存亡被光燉吾
兒繆通籍重得聯英鸞頑鄙當其中俯仰慚祖孫夫子
薦風義眷然推好敦昨旅同北都今來共南濱叶英哲
產自艱分氣勤化元繩矩用必莊天球質本溫藏蓄在
王府望瞻不可捫誰令冥海隅混揉珠貝繁蘭風滌瘴
腥桐韻澄壘喧邇來觀海居高寄城西原白雉不見來

蜃氣日夕昏將無序賢者乘桴慨遺言韓公曰良覲代
隔道共存時時出卮言珍怪無璵璠頗聞多幽味深澹
如丘樊蔚林斷湫鞅疏篠涵靜源萬境不能亂始知吾
性尊鳳文非可求惠然下蓬軒雖欽俯芥收終愧仰蘿
援即欲徃從之川梁棘我轅塵謠無足投望報來瓊琨
空荒坐遲晚勁策幸扶擗

題黃山人詩卷

山人黃震陽字一元臨川人能
琴善醫晚五行祿命來拜子縣

庭中持盛王二翰林詩卷
以代贄請詩因走筆還之

南來作縣官亦希遇異人三年霧眯目衣上多新塵
翩一黃鶴銜書祝融濱下庭展袖諷字字青瑤瑋既驚
旦暮契猶懷夙昔親鳳鳴燕雀間視聽暫得伸鶴乎果
有升天翼借我乘之朝玉宸

吉湖口湯泉

慕詭適修禊嘯侶閱靈淵機權知匪測橐籥詎云偏
感沸連波起鴻鑪不斷燃蓋石愈怪傑襟湖何渺綿
蕭丘有寒燄化理同一玄燧人與堯井無為帝力全

鷄黍詞

庭中有羣鷄主人賦之黍魯鷄偶遠立於此有遺秬越
鷄氣沾沾欣睨躍拙距主人軒然笑爾蠢何足語嗟哉
胡得喪可惡爾畜羽幸禍天所怒得喪天所與主人唯
至公但使豐年屢^叶

讀嘉靖改元詔書并閱邸報臣敬作詩一首

宮車昔晏駕鴻寶歸親賢元后上聖姿神龍潛虞淵乘
乾奉天祐皇極建冲年百辟迎代來凝命居清玄皇風

仁偃草一日周九埏震霆雨作解赫曦清昊懸除兇力
摧虎狃猱犴重鍵擊冥走鬼魁好問廣詢延急治熱願
濯從善坂流圓響答朝至昊萬幾無停宣泰否一徃復
乾坤隨轉旋昔自堯舜來神化無此前聲休度百王九
廟光蟬媽天祿永無疆聖治終始全臣詩屬先驅三靈
赫臨鑒叶

過湖

紆迴蒼壁帶平瑩玄銅鑑昊旭懸遂霄光景高下湛周

覽總一天纖埃馬受犯

漂水官舍

皇州本叢麗倅府亦多暇高木停車蓋白石砥根下鷄
犬寂不聞明窓晃低亞礪奏不絃琴山橫無筆架流雲
過簷牖斜照盪盪書畫巖居固同此此寓未稅駕

出高淳縣望寶積寺塔

巖邑無闔闔出市即郊隰淒涼木石寡衡縱畎澮襲微
陽廣土被厚霰蔓草浥四垂天茫茫忽覩斯獨立檀藥

布牙角亭突樹磴級卑壓蒼翳叢明標粉黛爰遂疑塵
井絡仍謂賢聖集旋行迥復遐窺戶廓沈載游煩少解
散空諦亦叢及

喜雨篇送推官李公

三農病焦裂百姓慕來蘇馬知皇運仁下土不終瘠良
風助玄雲灑浙散膏濡農人舖在野蒨室懽婦姑拜嘉
我李父駕言忽王都願挾懷中澤呈君被九區

送盛斯徵中丞巡撫江西

公昔危言行忠信嚴操持抗節抑權近獨結明主知騰
波百低昂底柱無虧移况茲唐虞朝盱夕須臾夔龍升
雲亦高松老節益竒眷言命召虎江沱煩撫綏愚凜狂
悖來十民九顛瘵於今保治要邦本最先宜公豈無素
鑒次第將裁施格君雖美談寧邦幸沉思世願與史聲
豈獨鄉人期

送徵明計偕御試

恭人當遠別思念畏寅送詎惟離群悵吳邦去光重

叶

奇珍不橫道端為宗廟用叶君其保氣體訊問懌寤夢

鄙夫誰向扣日益守空空叶時來玩鷓鴣雛頻仰見翔鳳

怠賦李陵詩願為王褒頌

鶴章

癸未歲人日余家構新堂成肅延北山老師醮陳感佑之謔當奏章時仙馭三輩旋

導燎臺奏升而駕亦逝衆目瞻竦敬賦一章
銘志玄賜燕謝周師精高之效書奉并望和

篇

歸命禮昊乾肅延事三清真功伏宸官得此金門卿碧
牘函赤心法步凌紫京八霄青瀾瀾剛颺別曾城獨馳

丹元叟直詣太昊庭紫皇已傳命仙駕垂雲征翩翩三
縞衣上下相承迎翔衛既通奏矯羽歛上升安得如几
飛淹留悅歡情傍嬉臣詎同畏威敢為榮始知精賢師
可以徹土誠銘襟永攀脩玄祉庶獲并

夏日林間

空林坐遠暑松蓋載炎日重陰集涼氣薄吹颺亦及幽
禽時度語遙礪汎清瑟厨人列齋素稚子來共食援琴
弄山海頗復似加適牛羊下前山自入後簷息余亦杖

策迴今辰茲已夕

汎舟登郡西諸山作

西巖蔚春氣丹翠絢長靄結駟出閭門日華浮羽蓋曉
市湊萬響方言九州會青翰迅妍洲遥遥背城邁中流
簫鼓鳴連甍夾隄起叶鶯吟方樹底鷗舞澄沙際叶柳

坂少依依花淑始絳縵逶迤度重嶺宛轉入蒙蒼欣遭
勝域奏慮遣俗累解薄暮風詠歸華月漾玄瀨鳴笳震
水關登陸且迴憇叶邀翔許可樂來往日月代

雜吟四首

青陽肇物觀披覽川隰外草木寒不榮玄鳥聞未至高
原有松柏亦為蠹蟲敗繁華須臾間後凋亦自貴惟望
多麥禾麥禾可卒歲

春日欣載陽淒飈霾曠蒙玄雲何許集晝夜彌衡穹孤
陽秉光淑元化潛開通

高樓臨道院舒目喬林端天際浮雲開遙見江上山山
中有禹書竹簡銷石函我欲往求之試尋古道觀惟恐

雲復合駕言空去還

鳳皇粲德文和鳴亦嘒嘒舉世未曾見衆口稱麗美唐
虞有至治千載盛傳聞學者抱典謨終年向人論舜死
鳳不來寒士長欣欣

賦得春陽曲戲東天文

錢唐蘇小小京洛董嬌嬈穠芳競桃李清潤並瓊瑤頽
山左右倚因風上下飄東隣不姓宋無恡一相邀

秋日作

危陽既驕夏衰霖復傷秋夏驕衆夫病秋傷田畷憂少
壯且頽墮耆人衷百愁萬物蒙化成聖賢豈有謀栖栖
非為佞駕言我馬求

偶述情事

投弁歸柴荆時晦企遵養頗諧築構庸亦遂灌植賞素
履暮已定空法獨結想自甘婁生戒無論

缺三字

衷和亦

氣謚焉足問直枉違俗柰束擾鈎校既非尚物理不爽

銖答應難絕響一旦

缺七字

鞅

為張孝廉題留犢圖送吳邑楊明府

東京扇庶耀風流
逮當塗時子牧淮
甸解犢振清模
介石似滅頂千載
不數夫安知後代
士裂膚韞明珠邕
邕楊夫子抱琴宰
東吳孟水謂食潔
戶兒言卹孤虞廷
奏箭韶鳳凰翥宸
都誰能獻丹青清
風擁前驅復願寫
縣壁告彼新尹圖

夢唐寅徐禎卿

唐生白虹寶荆砥
夙磨磷江河鯤不
徙魯野遂戕麟徐

子十缺一周遠討務精純遑遑訪魏漢北學中離群伊

余守初質溫故以知新誰出不由戶貌別情還均濁世
二三子厭棄猶為人相逢靡幽明隔域豈不親茲塗無
爾我相泯等一真昔亦念張孺猶能逐冥塵

賦得君馬黃送黃翰林

才伯

君馬黃臣馬驥驂以驥馬來何逢驥馬善折軸驥馬不
失馳天閑衛龍馭終不到瑤池

又絕句

二首

閨門車馬出揚柳綠依依龍樓清夢起開閣待君歸
江山司馬筆民物杜陵吟他年黃閣裏便是此時心

詩

四首

予見古今士遯世不

缺一字

屏志羔雁之咎或有知固所

答徒負旃旌嗚呼獨君臣之際哉

盈盈高樓女粲粲紅粉粧灼灼耀容華粲粲

缺一字

衣裳

丹唇激浩齒鬢髮婉清揚

缺一字

問里

缺一字

洞房見者驚

若神翹首仰輝光

名都多秀艷三五騁神逸六門交長衢窓中坐曉日行

行萬夫望

缺二字

不可匹君子嚴禮聘承筐富充積嘉耦

缺一字好速高堂鼓琴瑟

珠玉含澤輝妖女

缺一字

容華門巷多履綦

缺一字

治市門

誇紛紛容悅已日暮宿倡家

巍巍西山高湛湛山下水昂昂千丈松靡靡百草委下有虎鬼伏上有兔蘿倚

答黃魯曾

昔與君子別朔雪正霏霏
惠音阻良覲歎息避炎威
偃卧懷夙昔風雨滄淒淒
磊磊井上松秋菊晚相依
倏忽時候變星霜迅若飛

懷知詩

卧病泊然緬懷平生知
愛遂各為一詩少長
隱顯遠近存沒皆非所計
祇以心腑之真凡
十有八人共詩一十九首

同老十人

顧明府榮夫

錢太常元抑

王文學履吉

二首

葛隱君汝敬

湯徵君文守

謝處士元和

表弟蔣煜允暉

施侍御聘之

朱提刑升之

張秀才天賦

往者八人

吳文定公

王文恪公

韓尚書貫道

沈周先生

本郡使君南海林公

陸冢宰

朱孝廉性甫

朱文學堯民

顧明府榮夫

鷄山燕市每依依此日都拋入洛衣
家近鬱林公舊隱門如彭澤令初歸
空憐舊社惟君密却笑無車訪我稀
最愛滄浪池水好幾時同坐一方磯

錢太常元抑

入室芝蘭始見熏也知孤陋合離羣烟霄本自冥黃鵠
城市安能駐白雲震澤晚山青歷漕湖秋水碧泫泫
相思只借中天月會把清輝兩地分

王文學履吉 二首

七十看花歲已殘始憐梅蕊照衰顏河清可道遭逢易
駕俗深慚會合難錦繡段間藏黼黻龍珠抱媚江山
欲留光彩無窮事心緒悠悠竹素間

我居廬陌子滄洲望隔江城各倚樓共惜賈生違漢室

豈知王粲重荊州青雲尚恐終難附白壁空懷未盡投
十載三都墻室滿不堪玄晏思悠悠

葛隱居汝敬

獨承華緒振芳塵想見先公氣魄新開口只傳前輩事
存心不共此時人城中紫陌藏巢許門外青山是主賓
布褐一逢埃土盡誰言叔度賤還貧

湯徵君文守

舞勺歌詩把袂儔白頭俱換舊烏頭深憐武庫空懷寶

却羨名宗獨綴旒，擊壤舍君誰作伴。
看山無我不成遊，酣歌李白襄陽曲。
掌上隋珠國已收。

謝處士元和

薰茗清談午夜陪，詩筒拂旦又飛來。
應憐去日多來日，却見千迴似一迴。
槐院定酬王祐志，蘭庭休起卜商哀。
紅芳落盡青青在，始信松筠是德材。

表弟蔣燧允暉

風雨牀空坐獨闌，分襟兩見歲華殘。
蕭條鷗鷺江湖闊。

寂寞宮商草樹寒
王謝風流吾子在
武功中外老夫單
懷君有句君應笑
不向滄浪共釣竿

施侍御聘之

吳興

行藏蹤迹只雲萍
一種神襟爾我形
清角痛悲鳴晉鄙
黃鍾力挽向虞廷
丹山鳳去尼丘歎
紫府龍歸雪水靈
昨日書來淚盈把
南溟心語到東溟

朱提刑升之

楚州

渚萍漂泊合江離
並逐東流更不移
豈獨松篁能晚節

共拋簪綬向明時
烟霞草樹春容與
霄漢星辰夜陸離
慙愧逢人說桑梓
只如黃卷對光儀

張秀才天賦

惠州

文征屢北道空南雲
錦才華織女慙宗廟
豈能瑚璉舍蛟龍
未許土泥奔襟期
天合膠投漆光彩
神驚玉在函
不見書來誦書序
相望渾欲淚氈氈

吳文定公

穆穆文定淵淵金玉
風被四遠譽髦歸淑
伊余小子欽

承在夙籟雲駮附潛泥蠖伏嗣林銜恤悶息茅廬扣戶
請益拱肅趨隅教曰勗旃竭景劬書默爾富獲單辭靡
餘選曹展丘俾書皇綸山房接夕返楫同津永言夙好
傍諭前聞虛膺祗受充然萬珍公者後先三四及門一
瞻百益矧曰終身望之如日就之如雲大雅既喪悼實
徒紛

王文恪公

肅肅文恪有嚴我師扣竭空鄙博約無資片語必法寸

履皆規甘雨中含滋浹時熙屢躋於征靡辭有戚公薦
以升黃閣有職援呼曰三道掖謨百嗟予不肖鼎冶負
德邦作封史來相予總謂言冢君車迎館奉力襄懷報
寧公戾衆公往趣成傍誚莫誦公聞斯愠命我專統謂
守載屬同羣益汹終亦靡克公愾滋勇有矢畢命卒隊
茲恐公歸在堂復侍函丈三變泰如揚休彌暢湖山莫
高風霆下上嗟予懦與弗從以往中星載迴遄失几杖
梁木既壞吾將安放

韓尚書貫道

司徒巖巖四海具瞻孰不歛衽植偃確頑蒙遜以卑霄
麗泥蟠訖之招之令之曰前旭日垂熙溫誨孔殷昔我
先公政於晉陽知公於童拔立序庠範之德行訓之典
章古道世用啓迪游揚聲詩書畫亦靡不詳曰爾國器
必成用光公曰於乎前德不忘乃共之食乃賜之帛巖
威儼恪靖莊允塞拜賜必誠養德必實一望弗再有銜
以訖

沈周先生

有華東陽燧於吳門古有遺高展也茲存孰為先生秀
降三辰宵集萬寶手揮五雲九淵湛映千莖齊芬鶴跼
霄遠抗百風塵維予二祖式契且姻親公自髫屬於夕
昕齒惟父子視猶季昆聚晤負負援推勤勤謂子良史
左丘馬班謂子鵬運直舉橫騫安知乘馬班如迤邐終
需於泥以卒歲年余既暮矣公猶歸然於何不臧自遐
不因一往不復追悔空辛豈念平生我思古人

本郡使君南海林公

昌哉我牧百夫之特瞬洞萬莠平吞四渤經庫儲學智
囊韜識鷹刀一振百截以訖吳材總升胡特我特載笑
載言載詠以繹有作斯屬慚孤善述冥留靈逝奚贖身
百九京有知有茹闕臆

陸冢宰

陸締於我好也奕世中丞汪汪視實兄弟翔泳殊能達
磐別致川梁無接樞鐔遙契南都於邁日以文會勗哉

進修驩然游藝鷺先盟江湖結氣公績平寇尚克銘
紀首聚須臾夙約載厲迨登掌武爰均四海迹用地隔
禮有嫌廢穹淵契闊恍若越世恩譴公被不才余棄聚
散忽再幽明永異終則羣疑始亦何諱丹誠寸積悠悠
兩在天吳晝掠熬波夕沸芒芒大壑鬼兮何寄

朱孝廉性甫

秀矣孝廉名駒在谷白玉清冰碧梧翠竹少游諸老孤
鶯喬木子家日見匪暝維夙黃庭晉度朱絃漢曲羣公

星落長庚爾獨後生更仰雞羣昂鵠頽然順化行閱滄
陸修年默逝亦可世哭推緒君斷更莫彼續來英日富
風流絕目前修履踐流膏碎馥嗟子勤哉堆箱疊腹緊
我與君髡皓相逐今我視衆如君我矚餘霜猶幾三歎
不足

朱文學堯民

葑亦多彥哿矣兩朱崑丘連壁嶧陽雙梧子出最後遺
風爽如寒泉冬潔菜竹秋臞積百媚學孰儷君幼宵聞

片籍屏寐以須失之皇皇獲之愉愉拋裘噴炙投玉捐
珠珍香寶茗法繪名書清談晏對日坐仙區愛我維篤
棄我亦徐悵其邈矣臨風永吁

挽歌詩

清晨出閭門丹旗何飛翻問之路傍人新鬼即幽墳翹
望旗中題知吾夙所敦昨朝華屋間啞啞相笑言日月
畧流轉幽明已異門昔時強仁義茲辰聲益尊屬徒送
自返婦子亦一喧君獨長甘眠不知悲與欣由茲壽無

垠萬秋如一昏零霜殺宵草繞山游微魂游魂不復貴
所慰行節存

寶劍篇

我有三尺匣白石隱青鋒一藏三十年不敢輕開封無
人解舞術秋山鎖神龍時時自提看碧水蒼芙蓉家雞
未須割屠蛟或當逢想望張壯武揄揚郭代公高歌撫
匣卧欲哭干將翁幸得留光彩長飛星漢中

黃金篇

靈質自化育英姿藉鑪錘虹光衡煜煜晨曦縱焯焯紫
霞煽虛燄青渠暈幽蕤在銘未云卜躍治詎其宜能函
大鈞體伏型韞神奇何當錯寶銛戮妖血荒陲鴻秘已
出柙勲用吾未知痲市碎礎斧交易方紛披

八詠

禁省

彤華耀芝蓋初旭浮絳纈紫殿切五雲螭表雙端嶮千
門洞陰陰天光互明滅英英鳳翼擁肅肅羽旗列仙韶

忽然奏鳥獸咸應節皂囊上玉陛丹書出金闕

軍戎

西北羽書急半夜渡湟水上將受鉞出壯士把弓起天
王跪推轂四海盡雪耻殺氣入匈奴萬里地色紫凋戈
插犀甲鐵勒封馬齒平生百戰身常擬一日死

田家

溪流浸茅宇短簷挂犂鉏柔柔交午陰幽禽時相呼稚
子跨犢眠夢歸候朝舖稼翁釋其勞暨往携陶壺老妻

督少婦擇崗停辟鱸輕雨日日零羣苗盡懷蘇

漁釣

幸非城市住不舍煙波宅白鳥麗金沙蒼莓繞黃石涼
陰木澗青平遠水天碧梁寒魚盡落稻晚蟹猶瘠脩綸
倚苓箬敗笠蓋襍襖沽酒自易醉楓根忽終夕

禪林

泥洹金為地祇園寶作坊蓮猊兩足尊天龍億萬王燈
存千歲燄鑪騰百種香精舍坐苾芻屈曲蜂聯房又如

拘陀葉處處蔭青涼暫棲蘊已空弘慈不可量

宮觀

青霞抱琳館蘿陰絡深逕龜遊煙沼煖鶴立天壇淨微
香拂幽洞欲覓風不定雲房並縣簾晝日鎖虛靜琪殿
臨高臺時聞落瑤磬循除步周匝徧扣無人應

俠少

三游本豪武七貴元驕惰腰間血七耀頭上金丸過艷
妓掌列盤饗童口承唾高樓沸歌鍾王侯日盈座殺人

不須仇睚眦家立破郭氏族盡滅銅山死猶餓

宮閨

十五事君王三十色未接醪篠空近羊羔藹不集蝶昔
慚鴟夷汎今免呼韓挾天天東鄰子看星誦桃葉塗黃
斷橫雲流紅漬團靨金微幾千里一夜去來疊

太行歌

上客坐高堂聽僕歌太行六歲從先公騎馬出晉陽遙
循厚土足忽上天中央但聞風雷聲不見日月光狐兔

繞馬蹄虎豹嗥樹傍衡跨數十州四面殊封疆童心多
驚慄壯氣已飛揚自來江南郡佳麗稱吾鄉邈哉雄豪
觀寤寐不可忘人生非太行耳目空茫茫

金臺

東南控瀛海西北壓邊塵召公上輔周文侯方用秦子
丹養君子不惜如花人昭王禮郭生崇臺懸黃金齊方
入駟衍梁邦來劇辛從來燕好士疆國尚功勳

漂母祠

子胥逢擊絮遂為鞭屍人淮陰遇漂母終亦去亡秦豪
傑與嬋媛萬年共一塵清淮映古廟月明空沄沄安能
問市上復問哀王孫

題隱士山居

志士果藏隱勝境合冲間冥冥討幽蹟息躬構深山青
蘿施攔宇循除鳴流湍縑韋積皮几時衡素絲彈出郭
便無累何煩嵩華艱危岑寄遠氣屹矣不可攀

唐人寫蕃馬圖

天山一夜雪北風吹復乾
健兒騎馬出踏碎白琅玕
薄醉擁貂裘日暮不知寒
冬季飛鳥絕虛絃控不彈
馬知北海雁高翥入長安
帛書天上度何功報可汗

家藏馬遠春山行樂大幅

淑候媚川石初景澹林霏扶藤循石坂
楊柳共依依朱絃卧行襍隨往抱希微
無論遇高賞罷在道無違

戴文進松崖

陰崖萬古縣橫出千歲松中有落澗
遙怒躍數白龍長

年不聞聲發卷耳欲聳遠楚夕莽蒼町曠迴照紅此域
萬物靜尚有坐二翁何必非夷齊破衣蕭蕭風

劉西臺

珏畫松

何年楮先生結此太古骨飛龍蛻馘肉餘甲裹拘糜神
根發生理元氣日勃勃彭城已廿載此骨長不沒

題畫 二首

白雲媚蒼山寂寂太古春宵藹林薄中一區宅無鄰揚
子坐清靜閉門了玄文兩生勿輕過惟通問字人

季冬雪重積十日竒寒沍啁聞不聞葱蘢失其故客
子欲何歸中林猶獨步幸有蒼蒼松為辨去來路

秋山琴月圖

玉照洞秋水厓肅夜靈籟之感絲音茲舍太陰幽煌希
聲無倪迎之以虛承之以微

詠新安許氏石潭

沈沈山下潭粲粲潭中石結宇子亦賢喜作石潭客將
同丘生棲可有竒章癖茲標本余契遐詠亦馳適

次韻得之看梅

江梅不畏寒時至，開如霰瓌姿。靜在野卧病，不得見國
士。抱竒寶端居，察時變杖策出。城市蒿萊滿，荒甸遐尋

得幽賞。獨對姑射面，化泰草木蕃。時閉賢不見，無禾比

兩歲

缺二字

將九縣分珪，善會計棄士。如土賤俗儒，誦腐

簡鄉子樂耽。燕喜歌唐虞，授復譽湯武。戰子有經世懷

待賈不自獻，神威盛龍熊。竒秘卷帳鈴

去聲

時節會應求

風虎期非晏，巍然奮載績。志沛聲亦建

草閣玩水圖

濠上有川歎滄洲多海懷伊我江湖姿浩蕩中淵迴尋
秘右洞庭飛衿左蓬萊瑚琲探富獲存之無輕開揚波
萬古源蕩滴塞視埃誰能寫小筆聊意亦可諧仁智在
戶限寄言亦悠哉臨詠志一啓得者亦可推黃汾窈如
湮安問傅巖才

神游篇贈黃勉之

勉之將遠遊先
自呼五嶽山人

帝遣河上公下來赤縣游采真金庭房漫衍三十秋禹

書眇一策詎幾窮沉幽蘭香悅亦感安能久綢繆回首
視泰元紫烟覆神州壘落結五九杼軸冥交鈎內笈千
神鈐星雲表沉浮猿鹿總千歲桂姿無年休雨露黯在
下日月環輪流憶昨鶴上客招邀翫滄丘子既夙邁之
飄然躡霞輶長歌我勸駕神僭足孤留金烏鳴日觀玉
女呼洗頭三壺風帆迅弱水不容舟隨風唾珠玉空徧
缺二收聞有金光草窈墨無所投升攀星辰宮忽恍垂
前旒長跪問寶章八荒極探搜一餐換塵骨萬品皆蟬

蜉與子無往來逍遙齊所求

尚書內相毛文簡公挽辭

休辰盛文化畿吳富登庸蟬聯首四方藹藹來毛公翼
翼寶玉執桓桓岱山崇翊亮總王禮啓沃諧王衷三朝
補缺袞百辟詹清風職思謹詔相不練亦不竦公薨后
弔恤哀榮天壤終

懷星堂集卷四

欽定四庫全書

懷星堂集卷五

明 祝允明 撰

歌行

長安秋

長安昔日在關中洛陽浙右亦相同江東自古帝王宅
周秦已見氣葱葱長道石城如踞虎長道鍾阜似蟠龍
千年王氣浮天表一日真人建法宮天府天開天闕起
五門三殿當中峙五鳳樓前柳似烟奉天門外天如水

金陵金闕勝金城玉陛連天接玉京星散羽林霜氣肅
天臨華蓋日華明十二飛樓石門繚百萬貔貅屯八表
寶刹天花和月飛郊壇神樂穿雲霄御史當街百騎馳
將軍納陛羅霜鋒五侯甲第遙迷霧七貴前驅響闐風
鳳凰臺上鳳凰遊玄武湖中水似油萬戶鶯啼花裏曉
千家砧搥月中秋會同館外白雉多包茅楛矢交經過
重譯來賓醉卉服輕烟澹粉列青蛾六樓六館闢倡妍
日日新聲沸管絃狹市斜街迷錯絡曲房洞戶暗鈎連

吳下書生好遠遊，抱書來看帝王州。
那知高卧西風邸，蓬眉蕭颯長安秋。

呂梁行

呂梁縣水三十仞，於今洶湧乃安流。
禹平水土通九州，當此徐兗間，固水破山始行舟。
仲尼逢至人，其言載莊周。爾來二千年，高者乃夷衡者擊魚鰕龜鼈不可過飛。
鳥臨之回翔不能留，嗟爾東西南北之人胡為此中游。
到京忘家歸家忘京，不知此險死生隔，其中為心喉痛。

人皆化為至夫吁嗟乎孔莊之歎空悠悠

濟陽登太白酒樓卻寄施湖州

聘之

昔聞董糟丘嘗為李白天津橋南造酒樓人間二子不
可見唯有傑句挂余心肺爛爛珊瑚鉤長安風沙住不
得南歸再卧蘇臺秋泊舟濟陽城買酒銷客愁登樓拜
先生進爵澆黃流知章不語先生笑飛花亂撲過樓頭
金陵更無鳳凰遊岳陽莫將黃鶴留鄉關浮雲蔽落日
題詩卻寄施湖州余為先生牛馬走湖州乃是賀老儔

西塞山杜若洲與爾相期釣鼈去千年江海同悠悠

歌風臺

掉臂長安市遙從日邊來因過芒碭下步上歌風臺沛
公善任使猛士亡其骸帝業袖手成慷慨襟抱開大風
飛雲亦壯哉韓彭英盧相繼死寄命寺人髀股間未央
志氣拉颯摧相望千年餘安能為之哀明朝放舟淮浦
去項王韓侯祠下亦徘徊

清溪宮夢仙吟

都邑聲色區此有蓬蘿風黃埃不入門十月清溪宮幽
閣掩竹牖舒足眠高春隔林羽衣人焚香鳴槁桐微火
縈屑沈綠塵婉空蒙淒絃汎寒飈引聲入雲中吾不解
世曲聊與神明通思借大鯤翼小戲滄海東微暝已復
來客調猶未終

繼盧全體作星字詩

大明御天一百四十歲周星八風和七曜盈紫微四小
沫不守內屏欲凌昊穹紀上千天皇大帝勾陳宮狂字

冒越日近五帝內座側挾帝德刑以揮霍列宿橫行天
田中周天萬曜一旦比周為縱衡文昌顛倒六符屢滅
沒泰階不得平左右執法進退斂避與廷尉不守理刑
罰不中天獄滿貫索纍纍死人無名牽牛不得安服箱
織女不得織小東大東杼軸恚空耕桑一無成東有啓
明不啓明龍駕迂迴不知朝既盈九州分封諸侯越位
干天刑媿訾降婁大梁不能司矩莫西南秋不肅析木
大辰壽星不能執規肇東北春不榮南方三鳥閃爍恒

賜不能正炎紀實沈玄枵星紀不敢寒若使北極寧二
十八舍咸錯濶不問所主皆附阿曼擊以相盪傾郎位
十五漫衍不得宰赤子羽林軍胙塚不執兵狐南老子
性耄荒祗將日月諛人以千歲稱農祥不見八穀亡一
星亡不登一穀八星都抹殺那有一穀登德星散賢不
進東壁暗文不明三心披離隔夫婦恒星不見憂公卿
福星不號鮮于侁客星不名莊子陵柱史斥不得主記
注御女屏不得列好姪蒼龍把截作裳服白虎被翦作

干旌赤雀啾啾作崩徹玄龜妄獻兆大橫庚庚不顧叛
逆作孽不可活與臣子言依忠孝三能伴北辰墨墨天
中央一星亂天綱天屬盡失常豐隆不為瑞變竄色貌
青為蟲赤為兵荒餘氣鬱結不得申作霧塞京師竟日
玄以黃西畢為之哭終歲流滂滂坐令平陸為湖江浸
灌沒溺死天赤子十有三震雷號寒月喀喀摧棟梁四
孛視天如平坻謂可反手移凶氣既滿盈狂謀轉轉大
顛癡漸次日月尊亦將不自持四孛肆昧欺遲留伏逆

咸違期乃與其類羣氛衆沴團結為妖祲撒沙游燐潛
羅紫官內外遲禍機西邊喚天狗北畔呼旄頭長柄擎

攬槍大旗張蚩尤要以

缺三字

壬辰之夜反黃道乃當颺

回霧塞三精六合翻覆沈淪休皇天震怒敕六丁清宮
入禁窮禽蒐元凶四字肆鬻磔逆黨瑣碎咸屠劉血肉
與積藏堆塚如山丘當時從逆徒簡別分等儔流彗盡
掃除祥景重羅收有如臨淄王起兵半夜斬韋庶人沴
物散落如雪勿復留再將元氣太和窟搏作靈辰秀曜

挂為天皇旒森森布列三百六十五度四分之一之內乾
文燦爛文剛柔嗚呼日有食月有食皇天自悔禍萬古
明不息柰何凶殘餘敢行撓皇極穢亂盡蕩滌光華再
烜赫當孛乃不孛至矣仰帝力盡盪滌仰帝力

答孫山人一元寄吟卷歌

秋風落葉露為霜美人去我天一方只知朔雁翔南去
寧解魚書可寄將分開尺素雲生手濯濯芙蓉倚楊柳
金丹熒熒伏鼎竈寶劍時時拂河斗仙韶本是清都樂

欲奏人間舞羣獸去年送別吳王臺屐齒微蹤長綠苔
相思每望秦川月寄信俄逢越使來越使能寄書不知
書中意何如君能寄詩卷不知我腸車輪轉李白上天
鮑照沒此聲何處君留得霞為衣今月為澤金光草今
換君骨二子雄風不可尋九霄星露夜沉沉但看一片
千年月懸向青天照我心

送徐先輩

中行

吳王城中三月春吳王城外送行人飛花亂撲長江去

條風東來布帆舉將留欲舍心趣多難行難止柰君何
招鳳辭送彈琴揚三遊金陵

玄桐挂朱絲碧軫黃金徽獨抱登高臺坐上時一揮
清商不如清角悲鳳來歸鳳來歸高臺紅日麗秋暉秋
暉欲落兮鳳來不來

王右丞山水真蹟歌

生烟漠漠中有樹樹外田家幾家住重巒複塢隨不斷
茅舍時時若菌附兩人並向魚梁涉一鳥遙從翠微度

行雲澹映荒水陂似有斜陽帶微昀傍篠白沙明青林
涵沉霧乍明乍晦景萬變想當夏盡秋初處石墻短綠
隈隈水淺縈迴寬平一畝敞層屋板扉犬卧無人開書
堂樹深晝寂寂主人應是王摩詰清晨騎鹿看田出行
過柴泚日向夕會招高適與裴迪共賦輞川佳事畢圖
成興盡詩未筆

任月山九馬圖歌

古人頌馬自魯駟杜詩尤勝伯樂經近代畫馬稱曹韓

後來獨數李龍眠世無神手有神馬眼底誰能分造化
鄒陽示我軸有尺驚絕縱橫電光起定觀始識任都水
馬後金聲出吳李房星九點光殷殷天文地類相爛編
龍媒無種世亦產何必置牝宛代間於今不乏十二閑
如此久墮文書囊前年禦戎急芻騎何不引此踏賀蘭
嗚呼九駿安得歸龍班一匹可以當三千吾言亦能道
塞淵爾尚伏捩吾何言

俞漢遠雲山圖

洞庭之南瀟湘西濕雲從龍疑不飛九疑縱橫不可辨
二女望斷重華歸山河茫茫都一暝仙宮隱入層霄迥
水滸渾迷行路蹤雲端忽露青楓頂披圖亦覺亂心曲
嗟爾良工意何局人間晴雨相倚伏祇在君手一翻覆

曹民部藏何太守山水障歌

蒼烟橫晚江江樹不可辨遠山號國眉近山鬢不變誰
將元氣夜半翻凌亂少陵好東絹幽人絕流一葦航應
恨可人不相見千村萬落路不通恐有閉門忘世翁孔

明漸老安石卧誰為蒼生起卧龍須臾雲樹開蒼茫始
識九疑分瀟湘良工出自何水部妙思已落陳思王陳
思王今葛謝袖中脩脩有造化蕭齋晏坐對圖畫時發
雲霖潤天下

戴文進風雨歸舟圖

黃陵廟下瀟湘浦西風作寒東作雨鷓鴣啼舌到無聲
誰管行人望家苦柳州刺史幸不違長沙太傅音塵非
翠蛾班管在何處萬古重華呼不歸

唐寅畫山水歌

杜陵一疋好東絹，韋郎上植松兩榦。唐寅今如曹不興，
有客乞染淞江綾。前山如笑後如怒，疎林如風密如霧。
黯黯渾疑隔千里，蜿蜿忽辨緣溪路。黑雲沍蒼梧，丹霞
標赤城。壯哉畫工力，九州通尺屏。兩厓遠立鬣，兩角一
道空。江浸寥廓吳綾本，自淞水翦誰把。溜澗辨清濁，茅
齋傍江絕。低小羨爾高居長，自好今年吳地幾。魚鼈看
畫轉，覺心熱。惱黃金壺中一斗汁，我欲濡豪暎手濕。莫

教童子誤擗翻忽使癡龍携雨出

暮嶺歸樵圖

吳山嶺頭風蕭蕭吳山落暉紅抹腰蜿蜒鳥道自能認
只在中非市朝燒薪暖酒換魚煮五十行歌氣如虎
朱翁側足金馬門吾儂未舍無媒路

董烈婦行

大壑松不彫高山石不朽覆載無改易世有董烈婦烈
婦王氏名桂芳十七嫁與董家郎董郎卧瘵一年死烈

婦嘔血手斂藏當時信誓對日月誰能上掩日月光死
生契濶志不違老姑無依老母嫠母與烈婦伯父期他
年徐與重結禱為言汝壻昔僦居壻死居傳主人將奪
之汝曷來歸予汝棲與汝伯父相因依烈婦聞命志益
悲未聞太行王屋曾為愚公移天地生我死我自有處
何有一撮茅土為總帷啼眠風灑灑母曰護之不少舍
後數日母去謂汝送我而後返吾不汝詐婦勉從母歸
稍進一飯喀喀哽塞不能下長號浪浪淚滿把投匕曰

我去母復送之野烟雲慘澹日一抹宣公橋下水潑潑
婦云母乎河水清且淪漪吾往從之樂不可遏母聞驚
絕色慘怛大呼褰裳不可脫漸臺水深瀨水濶斷萍茫
茫強令活去矣還復入君門抱君靈主哭愬君君神在
木聞不聞肉摧血裂冤紛紛母去兒解防兒身終自妨
兒有十尺麻為君繫三綱粗粗髮經移在脰玉質高懸
几筵右手持元氣還乾坤青天增高地增厚是時婦年
纔十八英風烈烈塞宇宙嗚呼十五國風一共姜南朝

惟見李侍郎忠節不但臣妾慶為爾君夫何獨幸愷悌
君子洪嘉興二年一日風教行為爾成墳教埋玉彤管
有繹光熒熒豈徒肇家聲豈徒信鄉俗歌謠長吏澤愛
戴國家福慰存盡封恤樹勸望旌復嗚呼天下多美人
人百其身倘可贖

懷施侍御儒遂贈

三首

崇堞倚紫冥丹雘摩空青城中樹稀無鳥聲昨日聞公
入朝列相思一夜腸欲絕古人不可見今人交多面古

人千載只可慕今人可慕難可遇君離越王臺吳王臺

下來執手一徘徊銷盡萬古留中埃與君交一日一日

一日益叶韻交君未渠央我長不可極叶韻

嶺南古松氣森森如君此時之古心蜀山擁梓蟠天回

如君卓犖之奇材文章黼黻溟海深令言徽行貴燕金

天子策名作進士選衆舉為侍御史巡行塞徼安遠人

諫諍朝廷厲風紀餘力千詩百賦成四散江山被繡綺

丈夫行道志大申勲名祿位極此始

關關雎鳩在河洲妾事君子願到頭紅顏雖薄志貞固
脂澤履綦亦自脩鴛鴦錦囊鳳綺琴蕙筵蘭室奉徽音
金壺玉卮為君斟無將管蒯敗昔心願為南山之松栢
不為鶴鵠之離禽天道人性此最至人倫盡然同古今

送方行人鳳新擢南道侍御

彤門九重遠萬里四海平康此中起六月七月雜暑雨
街泥纒乾行沮洳送君都門東堂堂儀貌清且雄手持
繡斧騎花驄丈夫意氣凌紫虹飛帆南指青冥度石城

微茫繞烟霧明月娟娟淮水樓晴霞冉冉鍾山樹玄武
湖邊攬蒼翠北睇皇居想安寐何以獻之緘皂囊一日
三發迅鳥翔君能言君理盡君言安得皆流行一日三
發翔鳥迅酌君玉壺之美酒贈以錦橐之瓊琴清塵弱
水自此隔天涯日望瑤華音

北崖行

君不見吳江汝君子性如山善如水胸蟠萬卷帝未知
坦腹高眠故園裏明珠無淵不可含白玉須蘊嶮壘間

翦瓊截壁為小山，植朶芙蓉浸潺湲。花木被皁隰，鳥鳴
相闕闕。汝君子居盤桓，澄懷共高閒。攬蒼蒼兮瞻巖巖，
恍然卧遊穹巖邃。谷一日數十獨往還，蓬萊近東隔弱
波。衝廬南見空峩峩，人間大山西北多。太行恒華不得
並，列將如何我山不在大。俗駕不得過，題名曰北崖高
揖祝公為我歌。我歌北崖兮氣勢上，與浮雲齊光景凌
亂。干虹蜺撐星挂月拂紫微，崆峒倚天劔崑崙昇仙梯。
女媧遺子今日補天闕，或作筆柱寫帝黼。散揚鴻輝斧

鉞姦穴亂賊定君臣是非禮樂制作風雅發揮汝君子
北崖為子悅性情成功名請歌北崖行金石千年標頌
聲

獨當竒處行題何大叅子元藏沈隱君畫郴州

江山圖

祝融峯高插南極東南柳江流不息桓圭削綠浸瑤池
天下江山竒復竒昌黎序送廖道士地文爭竒無比擬
咄嗟道士不可當豈知今有何夫子何夫子謫仙人海

外紫鸞驚天邊石麒麟才如寶劍百亂截文似萬花天
下春昔辭瑤京下九國仙姿蕭颯難容得置之江山最
奇間明珠辭輝玉避色沈君頗似能寫真陳子善題濡
筆墨何夫子歸去來江山之奇亦小哉君有大道縣襟
懷我欲從之問消息郴江東去何時迴東瀛弱水倘可
渡與君握手登蓬萊

訟風

臣將衆心箋天公一月不改東北風酸澌射人痛兩瞳

零亂百物紛蓬蓬炊烟作難幸出窗涕淚滿面嘻何從
葦窻楮帳羞無功禽鳥素少并絕蹤鯤溟竭石海氣通
寧或鼓颺由癡龍六月七月如初冬風伯風伯聽吾訟
顛倒伏臘何強雄祇恐老天不君容

月泉篇

道人號月泉邀作月泉篇道院常有月道院本無泉石
壇空歌罷斜倚長松眠竽籟盡沉寂雲烟紛綿聯上有
黃玉頂下有碧瑤淵心賞極神暢不測何名天恍然欠

伸雙瞳開手握碧蘿
脚躡紫苔猶是朝元之字
步虛之臺人間少玄境
况此百肆萬火中安有廣寒與蓬萊
吾聞太湖之傍洞天之幽
千山繞繚相羅周其間飛珠噴玉
貫穿漱滌多異流
夜夜玉鏡飛上千山頭
來印萬壑金波滉漾寒光浮
姮娥下浴魑魅避眼波瑩照大九州
授仙老以玉訣與三光而俱留
道人已自夢中受得金鎖流珠之洞
文吞黃月而飲上池舞貝闕而遨蓬丘
世間月泉空悠悠軒轅之孫爾同儔
胸有日月袖有海能

為道人作此謳向來院宇多垢濁勿將靈詮語蟬

玉泉詠

滴滴瀝瀝瑤珮鳴縹緲縹緲銀河清權公妙句我斟酌
醍醐稍重瑠璃輕八功德水發源處分來南部深公許
六指道人隔墻住牀頭共聽無舌語

將歸行

丁丑九月選興寧廿七夜渡頭舟中
作時慈親在吳室人在廣兒在燕

老龍渡頭秋欲歸炎州霜輕葉不飛江東遊客未授衣
擁衾支枕歌式微自余之來日三吐燕吳萬里稀消息

自蘇越惠六千里京師九千里高堂夢轉眼冥冥山圍蜚船天潑墨南溟有龍不可屠北山有虎不可誅鴛鴦相望懷慈烏况又嶺南多鷓鴣

短長行

昨日之日短今日之日長昨日雖短霽而暄今日雖永陰復涼胡不雨雪為歲祥胡不稍暖開初陽徒為蔽天氣曠日黥黥人物慘慄無精光物情望有常造化誠巨量氣候淵美少君子道難昌陰晴長短不可問古來萬

事都茫茫獨憐窮海客卧者竟繞江南烟水航

月烏篇

吾鄉沈郎字仲寬為我遙索月烏篇月烏喻孝與客旅
二者未知心所安孝為百行大且初烏中曾參人不如
吾聞沈郎孝且才即此乃是曾之徒寒光滿林莫返哺
啞啞叫斷腸欲枯我今南飛依棘枝為子仰天強哦詩
烏啼月落粵山低一夜魂遊吳苑西

贈盛翰林

端明字希道

卞和能識玉荆山得良寶知玉不知人屢刖自殘槁孟
嘗有內珍何意貨賄間靈物不能舍神珠自來還盛公
抱天瑞手把山龍章懣與時人觀放之瀛壺傍朝披金
光草夕懸明月璫適從具茨來獨宿白玉房凡夫亦知
寶未得先生儻肯示以求之方

鳳凰篇

寄盛王
二太史

翩翩雙鳳凰飛集南海傍衆鳥往從之不棄老禿鶴鳳
凰自飛來只在海傍宿人為天下祥我為天下哭鳳鳴

四海清老鶴亦解啾啾聲老鶴無鳳姿籠中拘辱不得
爭鳳凰顧老鶴相慰勿自傷老鶴荅鳳凰鳳兮知老鶴
老鶴只在草莽伏物遇其類心凱康但令鳳凰聯翩上
阿閣老鶴百歲沒向江湖亦足樂

王提醴畫古松歌

人言松有節不見節如松問渠老葉終年翠何似妖花
三日紅人言松節勁不知松氣融元和暢生意華茂春
葱蔥和流則不強苦節亦道窮王夫子和氣滿胸中守

道百鍊之青銅畫史頗善喻為君寫古松子亦為君歌
古松古松歌君柰何

樂孺歌

吾鄉奚氏昆弟汝霑汝承篤於友恭天倫攸厚予題其堂曰樂孺取詩兄弟既

具和樂且孺之云也復為作歌

渚鴻不侶鷺聯翩入紫雲有時下同宿終然不離羣磊
落千金馬貢作萬乘車雙雙翼飛龍齊秣亦齊驅馳翔
有美世共珍列之天閑織其文叶以章有德勸百臣蒼
鷹雖鷲材狼猛安得稱重於其倫閭門今古道繁華歌

鍾日夕沸如麻東鄰宴公子西舍酣倡娃誰人堂上題
樂孺中有二士為奚家先人應能積為善天錫一雙白
璧皆無瑕伯兮友仲兮悌崇華鞞鞞風光媚架有五服
衣榻有共覆被入室諧蘭香出門偕遠志仗劔作長遊
千里萬里亦同次番禺城下我逢之三人相携共一醉
醉中尚能為爾歌歌此敬多感亦多吳中土風清且嘉
今如君者有幾何君家伯祖我祖高弟子文名風節猶
差我乃知仁人有後世濟美看爾富壽方來百福如山

河

孟玉礪畫瓜

溧陽夜燕來仲虛

狄冲

示我玉礪畫瓜圖
媽綿生意好

手筆燈前摸索聊為娛
爾日南至氣轉紆
我心之喜君知無
黃臺離離幾抱蔓
野田倘有青門夫
馬知大隄方包
杞含章墮天下
理天地相逢與
子起品物咸章
自此始

題徵明寫贈潘崇禮灌木寒泉大幅

具區之水被三州洞庭之樹千萬數沉森浩漭天下奇
灌木寒流此何許潘君抱朴山水人日日策杖獨行徧
滄浪之濱陽崖衆目悅暄媚忽逢陰壑如有神禹鎖老
龍鐵索絕擎雲怒雨出洞穴木號水呼竹石裂衆蛇從
之互盤結虵骨戍削雜鱗鬣留風葉拘株糜急流抨
撞石罅躍珠跳汞走闕灑潏微茫上析河漢注奔赴繞
伯若方丈脚山鬼伏窺木客泣欲據恐被山伯扶仙老
時下憇濯足而晞髮招潘君兮子來共千歲以一息潘

君歸語衡山氏仙之人兮不可以久留吾恐一往與境
俱失宣州兔肩毛勁如石深醮金壺玄玉液閉門夜半
後鬼工倏忽移來窅無迹支山謂潘君張君高堂白粉
壁焚香日坐對明月之夜風雨夕仙伯謂我當來覓携
君卷圖願寫照障入懷袖與君騎龍返無極餘影終非
世中物謝絕賓客局此室門外有人勿與識

卧病懷勉之

郊原行中春風顛閉門縮脚七日眠惟懷落落五岳客

仰頭抱膝作何物堯舜殂落文王沒仲尼寂寞書在壁
山川結陰草木僵馳今騁古皆未得携君璫璣之樂來
黃金香爐紫玉杯燒沉蕤蕙降古傑共聽君手奔風雷
頽然一醉萬事開

又

東園梅花白雪深大隄揚柳漸垂金欲往攀之烟霧陰
美人觀道坐空林洪厓舉觴江妃斟素女鼓瑟容成吟
我獨棲遲卧蘿屋詠君寶篇千萬足

閭門歌送郭令

雞鳴角烏烏閭門將啓塗船頭卒徒擁屋底翁媪呼呼
將兒孫起來送郭大夫大夫強汝柔大夫明汝愚大夫
飽汝饑大夫康汝痛教汝興禮節教汝誦詩書大夫舍
汝去汝能不思乎君子悅其文細人念其劬說向君子
道能歌歌大夫閭門開百姓懷雲帆指金臺天王御寓
萬國來萬國來仰帝力王道蕩蕩平康正直天子豈不
思思哉建皇極皇極建若三五大夫忠良伍志豈在朝

暮清風穆如去者慰存者懷穆如清風懷其存慰其去
穆如吉甫以永今古

首夏山中行吟


梅子青梅子黃菜肥麥熟養蠶忙山僧過嶺看茶老村
女當爐煮酒香

夢與表弟王制彛卿表甥陳鰲子魚散步河曲
鰲邀飲其室覺而賦之寫似二子

三人連袂闔闔行二少年第一老兄

一為舅甥姑逐便
言之要是寢語

莫言蕪葭倚高樹芳菲潤映蒼枝榮魚也有酒旨且多
曩也起舞我也歌渭陽棠杖聲相和明日可如今日何



懷星堂集卷五